

tu pusaasingan ni ama

kiyutrav ku kana pusaasingan ni ama mena'u ku zantu kawang na tuki, izu na sayasaya na sasing. maresan za pilralrang kaninku, musavak kanantu wari i savak kana dalan na vuwang. kana pusaasingan i savak, ulra saya pi'ayamen mi'ezeng i sa'esa' dalreu imaran nantu ikaliked. ulra sasa a lralrak, 'emuwale'ul za ruturutan, menadanadam makawang. ulra sasa a temakakesi, midinikesan za batong, pakirev kemelayatr kavavekas mungawayan. nanni maw a lralrak ziyani i ama.

kana pusaasingan i savak, mena'u ku kani ama zi i ina kemayan kana lipad, kiyangkinger za semasenay a lrengaw na lrevek. mena'u ku kani ama za taw ku avayaw kemayan kana kawi na eva, semangal meliyawliyus. mena'u ku kani ama za karakatikezir i itras kana zenan kani 'ali'etaw, taw puitrasaw nantu lima na mara'etrev liyakeliked. maw a lralrak ziyani na imu na ma'inayan zi na vavayan marengay i ama, ini mu, ninku pinazangal melrasez na sasing, maw nanku kina'aziyan malalup na trau. tu kiyutravay na pusaasingan ni ama, mena'u ku za dinapalran na tuki. izu mu, maw saya

a vinavalrayan za kina'izangan. sayasaya na sasing, sayasaya vira'an mararengay kaninku peniya, sazu naniyam kani ama na salaw pareerei' za trau na vativatiyan.

sahar ku kirepukasa kani ama mena'u za sasing kana pusaasingan. sazu tu pinarangerangeran ni ama a lralrak ziyani na pusaasingan. mukasa mi likeliked, mukasa mi mareveliyas kantu pinarangeran ni ama.

a aziyu ziyani na sasing mu, ta epetraw kana pusaasingan ta lrsezaw i ruma'. nu maranger ta mena'u mu, ta vakaraw na pusaasingan kemasayasaya vira' venakar mena'u. harem mu, muvalivalis lra na camēra, saema lra na camēra na inavakan kana vilumu. 'azi ta lra pasavesav za sasing mepetr i pusaasingan harem. kalre'ayan harem na soci, maruwa ta payas semasingzata kinakudayan kana wariwari. ta lrsezaw na sasing i soci zi i tēnnaw, maruwa ta payas mena'u. mawmu, 'azi meresan kana pusaasingan, nu ta vakaraw mena'u za ta sasing a kinaaidanan, parenger ta zata kinakudayan mu, liked ta i anger.

爸爸的相片

翻開爸爸的相簿，一張張相片帶著我進入爸爸的時光隧道。相簿裡，有小娃娃躺在床上；有小孩吃著奶嘴學走路；小學生拿著接力棒向前跑。相簿裡，看到爸爸和媽媽；看到爸爸抱著我，看到爸爸和朋友站在山頂。相簿裡，有年輕時爺爺和奶奶的照片，是爸爸珍貴的收藏品。那是一本成長的紀錄，有許多和爸爸有關的動人故事。

現今，相簿可以隨時存放在手機或電腦，隨時可以用手機記錄生活的點滴。回顧這些相簿，都會讓我們發出會心的一笑。